

06.03.2024.

Autor: urednik -- / 06.03.2024



SARAJEVO, 6. marta (FENA) - Federalni zavod za zapošljavanje danas je najavio skoro pokretanje programa sufinansiranja zapošljavanja i samozapošljavanja kojim je planirano zapošljavanje najmanje 6.900 osoba.

Direktorica Zavoda Helena Lončar izjavila je na konferenciji za medije u Sarajevu da je Programom sufinansiranja zapošljavanja 2024 osigurano 43 miliona KM kojim planiraju zapošljavanje najmanje 5.000 osoba, a za Program sufinansiranja samozapošljavanja Start up 2024 osigurano je 15 miliona KM kojim planiraju samozapošljavanje najmanje 1.900 osoba.

Dodala je da će Javni poziv poslodavcima za učešće u Programu sufinansiranja zapošljavanja 2024 (osim za mjeru Tražim poslodavca 2024 koja će biti objavljena naknadno) biti otvoren 18., 19. i 20. marta, a poziv za Start up 2024 će biti otvoren 20., 21. i 22. marta.

Lončar je pojasnila da će oba javna poziva biti otvorena na portalu Zavoda (www.fzzz.ba) u rubrici Projekti od 8.00 do 16.00 sati te da se apliciranje vrši online.

Federalni ministar rada i socijalne politike Adnan Delić podržao je realizaciju navedenih projekata jer ih smatra vrlo važnim za sve nezaposlene a posebno za mlade koji završavaju obrazovanje i žele da grade karijeru u BiH.

Istakao je da je zadržavanje mladih i obrazovanih ljudi jedini način opstanka i razvoja društva, te pozvao poslodavce da koriste programe FZZZ-a.

Delić je izrazio nadu da će na taj način biti smanjena nezaposlenost i da nećemo mnogo razmišljati o uvozu strane radne snage već da ćemo kreirati kvalitetno tržište rada bazirano na domaćoj radnoj snazi.

Poslodavci koji namjeravaju aplicirati na mjere u okviru Programa sufinansiranja zapošljavanja 2024 moraju se prethodno registrovati na web portalu Zavoda, kao i nezaposlene osobe koje namjeravaju aplicirati za učešće u Programu samozapošljavanja Start up 2024. Krajnji rok za registraciju je 8. mart 2024.